

Komunikadu Imprensa 04 Agostu 2020

Suku Atabae sei falta informasaun kona-ba asesu ba justisa formál

Iha 30 Jullu 2020, JSMP realiza treinamentu ba membru konsellu suku iha Suku Atabae, Postu Administrativu Atabae, Munisípiu Bobonaro kona-ba Demokrázia no Asesu ba Justisa Formál iha Timor-Leste. Partisipante sira kompostu husi membru estrutura suku ne’ebé mai husi aldeia lima ho totál hamutuk ema na’in 15 (feto 6 no mane 9).

“Treinamentu ne’e nu’udar atividade kontinuasaun husi programa JSMP nian durante ne’e no hanesan meu ida atu bele habelar informasaun hodi hasa’e koñesimentu membru konsellu suku no komunidade sira kona-ba demokrázia no oinsá atu asesu ba justisa formál iha Timor-Leste. Nune’e, sira bele dezempeña sira-nia papél ho di’ak liutan iha dezenvolvimentu nasional liuhusi sira-nia suku rasik,” dehan Diretora Ezekutiva JSMP, Sra. Ana Paula Marçal.

Durante treinamentu partisipante sira husu kona-ba lei ne’ebé regula hodi limita harii partidu polítku iha Timor-Leste, oinsá halo prosesu ba kazu abandona labarik, oinsa kazamentu ne’ebé legál no aplikasaun suspensaun ba pena prizaun sira ne’ebé dala barak halo komunidade sira konsidera lei la aplika ho di’ak.

Hatan ba kestaun ligadu ho partidu polítku ne’ebé mosu barak, JSMP esplika katak Timor-Leste opta sistema demokrázia ne’ebé rekoñese sistema multipartidarizmu. Multipartidarizmu ne’e regula iha Artigu 7 Konstituisaun RDTL. Tanba ne’e mak fó liberdade ba sidadaun no grupu se de’it bele harii partidu polítku. Mezmu nune’e, iha nia rekezitu sira ne’ebé tenki kumpri, regula iha Lei Nú. 02/2016 Primeira alterasaun ba Lei nú. 3/2004 kona-ba Partidu Polítku sira.

Enkuantu kona-ba prosesu kazu abandona labarik nian, JSMP esplika katak estadu tau as interese labarik sira nian no ba kazu sira ne’e nia prosesu liuhusi dalan sivíl iha artigu ida ne’ebé define kona-ba regulasaun podér paternál no bainhira inan-aman la kumpri sira nia never atu fó alimentasaun ba nia oan sira mak bele prosesu tuir dalan krime nian katak inan-aman la halotuir obrigasaun alimentár.

Kestaun kona-ba rekoñesimentu ba kazamentu ne’ebé legál, JSMP esplika tipu kazamentu oin tolu ne’ebé difine iha Kódigu Sivíl hanesan kazamentu iha igreja, rejistru sivíl no kultura ka adat

Rua Rua Beco Lakateu, Aldeia Manu fuik,
Suku Colmera, Administrativu Vera Cruz

Dili Timor Leste

PoBox: 275

Telefone: 3323883 | +670 77040735

www.jsmp.tl

info@jsmp.tl

Facebook: www.facebook.com/timorleste.jsmp

Twitter: @JSMPtl

ka barlakedau. Lei sivíl ne'e mós konsidera de'it kazamentu monogámiku tanba ne'e bandu ema iha feen ka la'en liu ida.

Entretantu kona-ba tribunál aplika suspensaun ba pena prizaun, JSMP esplika katak tuir Lei Kódigu Penál Artigu 68 haktuir katak tribunál bele suspende pena prizaun aplikada ne'ebé la aas-liu tinan 3 nia ezekusaun, durante tinan 1 to'o tinan 5, hahú iha desizaun tránzitu iha julgadu. Ida ne'e signifika katak pena prizaun ne'ebé menus husi tinan 3 mai kraik, tribunál sei suspende tiha pena prizaun, la aplika pena prizaun efetivu. Bainhira tribunál aplika pena prizaun efetivu ka ezekusaun pena prizaun ba kazu ne'ebé pena prizaun menus husi tinan 3, tribunál tenke fundamenta nia desizaun ne'ebé la suspende ezekusaun kuandu pena aplikada fo-fatin ba suspensaun ne'e.

Iha intervensaun xefi suku Sr. Paulino Mali Bere haktuir katak informasaun ne'ebé JSMP fahe foin primeravés hala'o iha nia suku no nia apresia tebes ho JSMP nia prezensa atu fahe informasaun kona-ba demokrázia no asesu ba justisa formál iha Timor-Leste ne'ebé durante ne'e sira nunka hetan asesu ba informasaun hirak ne'e.

Xefi suku mós husu ba estrutura suku sira atu kontinua fahe tutan informasaun hirak ne'ebé hetan ona husi JSMP ba komunidade sira ne'ebé sira partense ba hodi nune'e komunidade sira bele hatene no kompriende dí'ak liutan ita-nian sistema demokrázia no justisa iha rai laran..

Programa ne'e hetan apoiu hosi Governu Repúblika Demokrática Timor-Leste (RDTL) liuhosi Gabinete Apoiu Sosiedade Sívil, Gabinete Primeiru Ministru.

Atu hetan informasaun liutan favór kontaktu:

Ana Paula Marçal
Diretóra Ezekutiva JSMP
Diresaun e-mail: ana@jsmp.tl
Email: ana@jsmp.tl
Website: <https://jsmp.tl/>
info@jsmp.tl